



Republika e Kosovës
Republika Kosovo - Republic of Kosovo
Kuvendi - Skupština - Assembly

Ligji Nr. 03/L-142

LIGJI PËR RENDIN DHE QETËSINË PUBLIKE

Kuvendi i Republikës së Kosovës;

Ne mbështetje të nenit 65.1 të Kushtetutës së Republikës së Kosovës,

Me qëllim të vendosjes së rregullave ligjore për ruajtjen e rendit dhe qetësisë publike.

Miratton

LIGJI PËR RENDIN DHE QETËSINË PUBLIKE

KREU I
DISPOZITAT E PËRGJITHSHME

Neni 1
Qëllimi

Qëllim i këtij ligji është rregullimi i sjelljes personale në mënyrë që të ruhet rendi dhe qetësia publike.

Neni 2

Fushëveprimi

Fushëveprimi i këtij ligji është ruajtja e rendit dhe qetësisë publike, duke përcaktuar kundërvajtjet kundër rendit dhe qetësisë publike, si dhe duke paraparë ndëshkimet për kryerjen e kundërvajtjeve.

Neni 3

Përkufizimet

1. Termat e përdorur në këtë ligj kanë këtë domethënie:

“Rendi dhe qetësia publike” nënkupton respektimin e sistemit ligjor dhe të institucioneve publike nga ana e qytetarëve, si dhe mbrojtjen e interesit ligjor dhe të lirive të personit.

“Vendi publik” nënkupton çdo hapësirë të mbyllur apo të hapur, qoftë private apo publike, ku qytetarët kanë qasje nga e drejta apo në bazë të ndonjë ftese, të shprehur apo që nënkuptohet, qoftë me apo pa pagesë në të holla, por jo edhe vendet që përdoren vetëm nga një apo më shumë persona për tubime private ose për qëllime tjera personale.

“Hapësira private” nënkupton pronën me mundësi për të hyre me lejen e pronarit, poseduesit apo personit tjetër të autorizuar.

“Rrahja” nënkupton konfrontimin fizik- në mes të dy apo më shumë personave, në përpjekje për t'i shkaktuar lëndime njëri tjetrit.

“Prostitucioni” nënkupton kryerjen e akteve seksuale për përfitime materiale, me të holla ose me ndonjë vlerë tjetër ekuivalente;

“Person zyrtar” nënkupton personin e zgjedhur ose të caktuar në një organ publik apo personin e autorizuar në një organizatë afariste ose në ndonjë tjetër person juridik, i cili në sajë të ligjit apo të ndonjë dispozite tjetër të nxjerrë në përputhje me ligjin, ushtron funksione publike dhe i cili brenda këtyre funksioneve ushtron detyra të veçanta, bazuar në autorizimet që ka në bazë të ligjit.

“Zhurma” është tingulli (zëri) i lartë dhe i padëshirueshëm.

“Organi Kompetent” nënkupton Ministria e Punëve të Brendshme.

KREU II

KUNDËRVAJTJET KUNDËR RENDIT DHE QETËSISË PUBLIKE

Neni 4

Sjellja arrogante

1. Kushdo që në vend publik, nxitë ose merr pjesë në përleshje dënohet për kundërvajtje, përveç atëherë kur paraqet vepër penale.
2. Kryesi i kundërvajtjes nga paragrafi 1 i këtij neni dënohet me gjobë prej pesëdhjetë (50) Euro deri shtatëqind (700) Euro apo me dënimin me burg deri në pesëdhjetë (50) ditë.
3. Nëse kundërvajtja e paraparë në paragrafin 1 të këtij neni, kryhet ndaj personave zyrtar ose personave tjerë që mbrojnë rendin dhe qetësinë publike sipas ligjit në fuqi për tubimet publike, ai/ajo do të dënohet me gjobë prej njëqindpesëdhjetë (150) deri nëntëqind (900) Euro apo me dënimin me burg deri në gjashtëdhjetë (60) ditë.

Neni 5

Sulmi verbal

1. Kushdo që në vend publik përdorë fjalë ofenduese, me qëllim që të provokoj prishjen e rendit dhe qetësisë publike, dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej tridhjetë (30) deri pesëqind (500) Euro apo me dënimin me burg deri në dyzet (40) ditë.
3. Nëse kundërvajtja e paraparë në paragrafin 1 të këtij neni, kryhet ndaj personave zyrtar ose personave që mbrojnë rendin dhe qetësinë publike sipas ligjit të në fuqi për tubimet publike, ai/ajo do të dënohet me gjobë prej njëqind (100) deri shtatëqind (700) Euro apo me dënimin me burg deri në pesëdhjetë (50) ditë.

Neni 6

Sjelljet e pa hijshme seksuale

1. Kushdo që në vend publik kryen ndonjë akt seksual, ose ekspozon ndonjë pjesë intime të trupit apo bën ndonjë sjellje të pahijshme seksuale që shkakton shqetësim të qytetarët, dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej njëqind (100) deri shtatëqind (700) Euro apo me dënimin me burg deri në pesëdhjetë (50) ditë.

Neni 7
Marrja me Prostitucion

1. Kushdo që përfshihet në një akt seksual të prostitucionit, dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej njëqind (100) deri nëntëqind (900) Euro apo me dënimin me burg deri në gjashtëdhjetë (60) ditë.

Neni 8
Bezdisjet Publike– Shkeljet që kanë të bëjnë me zhurmën

1. Kushdo që shkakton zhurmë të pa nevojshme dhe të padurueshme që dëgjohej të banorët për rreth apo në rrugë dhe që shqetësojnë personat tjerë nga ora 22:00 e deri në orën 07:00 gjatë ditëve të javës dhe prej orës 23:00 e deri në orën 07:00 të shtunave dhe të dielave, dënohet për kundërvajtje.
2. Nëse kundërvajtjet nga paragrafi 1 të këtij neni janë kryer nga personi fizik, ai /ajo dënohet me gjobë prej tridhjetë (30) deri pesëqind (500) Euro.
3. Nëse kundërvajtjet e parapara në paragrafin 1 të këtij neni janë kryer nga pronari ose personi përgjegjës i një subjekti juridik, ai/ajo dënohet me gjobë prej njëqindpesëdhjetë (150) deri shtatëqind (700) Euro.

Neni 9
Dehja në vend publik

1. Kushdo që shfaqet në vend publik dukshëm i dehur ose nën ndikim të substancave të kontrolluara (narkotike), jo të përdorura sipas terapisë dhe në rrezik veten, personat tjerë ose pasurinë dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej tridhjetë (30) deri pesëqind (500) Euro apo me dënimin me burg deri në tridhjetë (30) ditë.

Neni 10
Kërkimi i lëmshës në vend publik

1. Kushdo që në vend publik kërkon lëmshë në mënyrë të bezdisshme dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej tridhjetë (30) deri pesëqind (500) Euro.

Neni 11
Ekspozimi e materialit të turpshëm dhe ofendues

1. Kushdo që shpërndan ose ekspozon ndonjë shkrim, shenje, ose paraqitjeje tjetër të dukshme e cila ofendon ose turpëron dikë, me qëllim që të nxis prishjen e qetësisë dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej njëqind (100) deri tetëqind (800) Euro apo me dënimin me burg deri në dyzet (40) ditë.

Neni 12
Mbikëqyrja e shkujdesur e shtazëve

1. Kushdo që në vend publik mbanë ose ka shtazë pa mbikëqyrje ose pa mjetet e duhura mbrojtëse, dënohet për kundërvajtje.
2. Kryesi i kundërvajtjes të paraparë në paragrafin 1 të këtij neni dënohet me gjobë prej pesëdhjetë (50) deri pesëqind (500) Euro.

Neni 13
Mbrojtja e të miturve

1. Pronari ose personi përgjegjës i një veprimtarie afariste, i cili lejon të miturin nën moshën 16 vjeçare, që pa shoqërimin e prindërve ose kujdestarit, të hyjë dhe/ose qëndrojë në një lokal afarist, në të cilin prej orës 22:00 deri në ora 07:00 shërbehen pije alkoolike, do të dënohet për kundërvajtje:
2. Kryesi i kundërvajtjes së parapare në paragrafin 1 të këtij Neni, do të dënohet me gjobë prej pesëdhjetë (50) deri shtatëqind (700) Euro apo me dënimin me burg deri në dyzet (40) ditë.

Neni 14
Lajmërimi i rrejshëm

1. Kushdo që me dashje shkakton alarmim të rrejshëm lidhur me zjarrin apo ndonjë emergjencë tjetër tek ndonjë organ i emergjencave dënohet për kundërvajtje.
2. Kushdo që me dashje shkakton panik në tubime publike, duke lajmëruar rrejshëm për alarm nga zjarri dhe për kërcënim me bombe, do të dënohet për kundërvajtje.
3. Kryerësi i kundërvajtjes të parapare në paragrafin 1 dhe 2 të këtij neni, dënohet me gjobë prej tridhjetë (30) deri pesëqind (500) Euro apo me dënimin me burg deri në tridhjetë (30) ditë.

Neni 15

Krijimi i rrethanave te rrezikshme

1. Kushdo që vendos ndonjë send apo pajisje përpara ndërtesës, murit mbrojtës apo murit të jashtëm me të cilën mund të shkaktoj lëndime fizike tek këmbësorët dënohet për kundërvajtje.
2. Kushdo që hedh në rrugë sendin ose mjetin ose vendos sende tjera në vend të pasigurt në ballkonin ose në pjesën e jashtme(prag) të dritares të cilat mund të lëndojnë kalimtarin ose i shkakton ndonjë dëm material personit tjetër, dënohet për kundërvajtje.
3. Personi fizik, pronari i biznesit apo personi përgjegjës i tij i cili nuk ndërmerr masat e nevojshme për ta mbyllur apo siguruar pusin(bunarin), gropën, kanalën, instalimet elektrike dhe pajisjet tjera të cilat paraqesin rrezik për këmbësorët dënohet për kundërvajtje.
4. Nëse kundërvajtjet nga paragrafët 1 deri 3 të këtij neni janë kryer nga personi fizik , ai /ajo dënohen me gjobë prej tridhjetë (30) deri pesëqind (500) Euro apo me dënimin me burg deri në tridhjetë (30) ditë.
5. Nëse kundërvajtja nga paragrafi 1 deri në paragrafin 3 të këtij neni është bërë nga pronari i një subjekti juridik apo i autorizuari i tij , ai/ajo dënohet me gjobë prej njëqindpesëdhjetë (150) deri tetëqind (800) Euro apo me dënimin me burg deri në dyzet (40) ditë.

Neni 16

Mospërfillja e urdhrave te ligjshëm

1. Kushdo që me dashje nuk përfill urdhrin e ligjshëm të zyrtarit lidhur me rendin dhe qetësinë publike dënohet për kundërvajtje.
2. Individit, pronari ose ndonjë person përgjegjës i një veprimtarie ekonomike, i cili nuk e zbaton urdhrin e ligjshëm të ndonjë përfaqësuesi zyrtar nga kompania për ujë, rryme elektrike apo nxehje, për ta ç'kyqur përkohësisht nga rrjeti elektrik, i ujit apo i nxehjes, duke rrezikuar kështu qytetaret, apo nuk e zbaton urdhrin e ligjshëm të përfaqësuesit zyrtar të kompanisë elektrike, të ujit apo nxehjes, për ta rikyçur në shërbimet e përmendura më sipër, do të gjobitet për kundërvajtje.
3. Nëse kundërvajtja nga paragrafi 1 i këtij neni është kryer nga personi fizik , ai /ajo dënohen me gjobë prej njëqind (100) deri shtatëqind (700) Euro apo me dënimin me burg deri në dyzet (40) ditë.
4. Nëse kundërvajtjet e parapara në paragrafin 1 të këtij neni janë kryer nga pronari ose personi përgjegjës në kuadër të një subjekti juridik , ai/ajo dënohet me gjobë prej njëqindpesëdhjetë (150) deri tetëqind (800) Euro apo me dënimin me burg deri në gjashtëdhjetë (60) ditë.

Neni 17
Vandalizmi

1. Kushdo që me dashje, paramendim, apo me qëllim të keq shkakton dëm apo shkatërron strukturën apo përmbajtjen (brendinë) e pronës publike ose private dënohet për kundërvajtje.
2. Kryesi i kundërvajtjeve të parapara në paragrafin 1 të këtij neni dënohet me gjobë prej njëqind (100) deri nëntëqind (900) Euro apo me dënimin me burg deri në gjashtëdhjetë (60) ditë.

Neni 18
Mos mbikëqyrja e të miturit

1. Nëse kundërvajtja është kryer si pasojë e dështimit të mbikëqyrjes së fëmiut nga ana e prindit apo kujdestarit të fëmiut që ka kryer veprën e kundërvajtjes, sipas këtij ligji prindi apo kujdestari dënohet për kundërvajtje.
2. Kryesi i kundërvajtjes nga paragrafi 1 i këtij neni dënohet me gjobë prej pesëdhjetë (50) deri katërqindpesëdhjetë (450) Euro.

KREU III
SEKUESTRIMI I MJETEVE

Neni 19
Sekuestrimi i mjeteve dhe sendeve

1. Organi kompetent mundet menjëherë ta sekuestroj mjetin ose sendin e përdorur, të përfituar ose mjetin përkatësisht sendin që do të përdoret për kryerjen e kundërvajtjes edhe në rast se kryesi i kundërvajtjes nuk është pronari i pasurisë së sekuestruar.
2. Organi kompetent mund të sekuestroj mjeteve ose sendet deri në marrjen e vendimit të plotfuqishëm nga ana e gjykatës kompetente.

KREU IV
DISPOZITAT PER FUNDIMTARE

Neni 20
Mbikëqyrja

Për mbikëqyrjen e zbatimit të këtij ligji, përgjegjëse është Ministria së Punëve të Brendshme

Neni 21
Shfuqizimi

Ditën e hyrjes në fuqi të këtij ligji shfuqizohet Ligji mbi Rendin dhe Qetësinë Publike (“Gazeta Zyrtare”) e KSAK Nr. 23/81

Neni 22
Hyrja në fuqi

Ky ligj hyn në fuqi pesëmbëdhjetë (15) dite pas publikimit në Gazetën Zyrtare të Republikës së Kosovës.

Ligji Nr. 03/ L-142
17 shtator 2009

Kryetari i Kuvendit të Republikës së Kosovës,

Jakup KRASNIQI